

5. GAIA:

Gerra Zibila (1936-1939)

5.1 Altxamendu militarra eta gobernuaren erantzuna.

5.2 Nazioarteko testuingurua.

5.3 Euskal Estatutua.

5.4 Gerraren bilakaera (Espainian eta Euskadin).

5.5 Erretagoardiako indarkeria.

Gerra Zibila, Espainiarentzat XX. mendeko gatazka politiko eta sozialik sakonena izan zen. Ondorioek hamarkadaz markatu zuten herrialdearen bilakaera politikoa, ekonomikoa eta kulturala. Gatazka ez zen bat-bateko talkaren emaitza; Errestaurazioaren amaieratik eta Primo de Riveraren diktaduratik zetorren estatuaren narriadura, eta II. Errepublikan (1931–1936) muturrera eramandako polarizazio politiko eta sozial larriaren, konspirazio militarren eta demokraziaren aurkako indarren jardunaren ondorioz piztu zen. Errepublikaren erreformek —lurralde-antolamendua, nekazaritza, armada, hezkuntza eta Elizaren rola— aukera historiko berriak ireki zituzten, baina aldi berean sektore kontserbadoreen eta indar iraultzaileen arteko tentsioak areagotu zituzten, eztandaraino.

Testuinguru horretan, 1936ko uztailaren 17–18ko altxamendu militarra, hasieran porrot partziala izan zen arren, herrialdea bi bandotan zatitu zuen eta gatazka zibil eta internazionalizatuan bihurtu zen. Eremu errepublikanoan, ia ezinezkoa izan zen botere bateratua mantentzea (gobernua vs kalea/iraultza soziala), eta matxinatuen eremuan Franco aginte gorenera iritsi zen hiru hilabeteko epean.

Gerra ez zen soilik Espainiako gatazka izan: faxismoaren eta antifaxismoaren arteko talkaren erdigune bilakatu zen. Alemaniak eta Italiak matxinatuei laguntza eskaini zieten, eta URSSek eta Brigada Internazionalek Errepublikaren alde esku hartu zuten. II. Mundu Gerraren prologo edo “entsegu-zelaia” izan zen, perspektiban begiratuta.

Euskal Herriak bere berezitasuna izan zuen gatazkan. 1936ko urriko Euskal Estatutua larrialdi egoeran onartu zen, eta Jose Antonio Agirreren Euzko Jaurlaritza eratu zen, ordena publikoa, erlijio-askatasuna eta autonomia zabalak uztartuz. Euskal frontea 1937an erori zen, baina Agirrek Gobernuaren zilegitasuna defendatu zuen, erbestean erresistentzia mantenduz.

Azken bi urteetan, gerrak forma guztietako indarkeria eta errepresioa ekarri zituen. Bi aldeetan gertatu bazen ere, izaera guztiz desberdina izan zuen: errepublikarren eremuan hasierako kontrolik gabeko indarkeria nagusitu zen; matxinatuen eremuan, berriz, errepresioa sistematikoa eta planifikatua izan zen, gerra amaitu ondoren ere luzatuko zena. Gerra 1939ko apirilaren 1ean amaitu zen Francoren garaipenarekin, eta haren ondorioak —heriotzak, erbestea, gosea, beldurra eta diktadura luzea— belaunaldi askotan iraun zuten, diktadorearen heriotza arte 1975ean eta ondorengo transizio politikoraino.

Gerra Zibila ez zen soilik tentsio politiko baten ondorioa izan: Estatu moderno baten porrota, nazioarteko konfrontazio ideologikoaren laborategia eta gizarte zibil oso baten hondamendia izan zen. Ulertu gabe, ez da posible ondorengo frankismoa ulertzea, ezta Espainiako demokraziaren berrezarpena ere.

5.1 Altxamendu militarra eta gobernuaren erantzuna.

1936ko uztailaren 17–18ko altxamendu militarra ez zen ustekabeko kolpe bat izan; aurretik antolatutako konspirazio zabal baten emaitza izan zen, non militarrekin batera, monarkikoek ere aritu ziren. Militar talde batek —Emilio Mola, José Sanjurjo, Francisco Franco, Queipo de Llano, Goded, Cabanellas eta Yagüe Afrikako tropen gidaritzan— Errepublikaren kontra egitea erabaki zuen, sistemaren krisi politiko eta sozialak eta Fronte Popularraren garaipenak eragindako beldurrekin uztartuta. Altxamenduaren helburua argia zen: II. Errepublika desagitea eta ordena kontserbadore baten bidez estatuaren kontrola berreskuratzea.

Hasierako planak, ordea, porrot partziala izan zuen. Matxinatuek ez zituzten kontrolatu hiri nagusiak —Madril, Bartzelona, Valentzia edo Bilbo— eta herrialdea berehala bi eremutan banatu zen, gatazka armatu luze eta odoltsu bati bide eginez. Matxinatuen kontrolpean geratu ziren eremuetan armadak eta aginte zibil frankistek boterea berehala egituratu zuten, aldi berean guztiz bilatutako eta antolatutako errepresioa sistematizatuz etsai guztien aurka; errepublikanoen alde geratutako lurraldeetan, berriz, segurtasun-indarren desegiturak, ezin kontrola mantentzea eta ezkerreko mugimendu iraultzaileak sortutako tentsioek boterearen zatiketa larria eragin zuten. Batetik, gobernuak legalitate errepublikanoa defendatu nahi zuen; bestetik, sindikatu iraultzaileek eta miliziekin lotutako erakundeek kalea eta lantegiak kontrolatzen zituzten egoera oso konplexua eragiten eta zailtasun handiak sortuz botere bakarrak gerra modu eraginkorrean bideratzeko. Honek ere gehiegikeri izugarriak eragin zituen, legez kanpoko heriotzak eta errepresioa eskuinekoen aurka.

Hiru hilabeteko epe laburrean, matxinatuek egitura politiko eta militar sendoa lortu zuten. Urrian, Francok aginte gorena eskuratu zuen (Estatuko Buru eta Jeneralisimo), eta horrek boterearen zentralizazioa eta matxinatutako bandoaren batasuna bermatu zuen. Errepublikan, ordea, egonkortasuna askoz zailagoa izan zen. Hasierako Giral gobernuak, uztailaren amaieratik irailaren hasiera arte iraun zuen, Estatuaren kontrola berreskuratu eta altxamendua zapaltzea zuen helburu, baina segurtasun-indarren zatiketak, erakunde militar profesionalaren ia kolapsoak, herritarren zati handi baten armamentu espontaneoak eta Katalunia zein Euskal Herriko autonomia-dinamiken indartzeak gobernuaren amore ematera eramane zuten.

Irailean Largo Caballeroren gobernu antifaxista sortu zen, 1937ko maiatzera arte iraungo zuena, PSOE, PCE eta CNTren arteko oreka politiko zaila lortzeko ahaleginean. Baina egoera ez zen erraza: armak falta ziren, ekoizpen militarra motel abiatu zen, eta milizien antolaketa autonomoak —Estatuaren kontrolpetik at geratuak— defentsa zentralizatua berehala ezinezko bihurtu zuen.

Gobernuaren erantzun estrategikoak hainbat norabide hartu zituen: milizia iraultzaileak Armada Popular berrian integratzea; industria gerrarako egokitzea; eta gizartearen mobilizazio zabala sustatzea, “¡No pasarán!” bezalako sinboloek adierazten duten bezala. Hala ere, barneko zatiketek —CNT, UGT, PCE, POUM eta alderdi errepublikanoen arteko tentsioek— eta boterearen desorekak eragin nabarmena izan zuten errepublikaren defentsaren eraginkortasunean.

Altxamenduaren eta gobernuaren lehen erantzunaren ondorio nagusia bikoitza izan zen. Batetik, gatazka ez zen kolpe militar azkar bat izango, baizik eta bi proiektu politiko eta sozial guztiz kontrajarri elkarren aurka lehian aritutako ziren gerra zibil luze eta ideologizatua. Bestetik, hasiera-hasieratik, gerraren izaera ez zen bakarrik nazionala izan: matxinatuek Alemaniaren eta Italiaren laguntza militar zuzena jaso zuten, eta errepublikanoek Errusia Estalinistaren eta nazioarteko babes oso mugatua eta

konplexua izan zuten. Horrek gatazkaren dimentsioa handitu eta Espainia faxismoaren eta antifaxismoaren arteko talkaren lehen eremu nagusietako bat bihurtu zuen.

5.2 Nazioarteko testuingurua.

Gerra Zibila ez zen Espainiako gatazka isolatua izan; European garatzen ari zen tentsio ideologiko eta geopolitikoaren parte bihurtu zen berehala. 1930eko hamarkadan faxismoaren gorakadak —Italian Mussolini (1922tik boterean), Alemanian Hitler (1933tik Kantziler eta 1934ean Fürher gisa botere osoa bereganatuta)— eta demokrazia liberalen ahuleziak eragin zuzena izan zuten gatazkan. Espainiako gerra, maila askotan, faxismoaren eta antifaxismoaren arteko lehen konfrontazio handi armatu bihurtu zen. Franco zuzenean izan zen hasieratik Hitler zein Mussoliniren laguntza zuzena jasotzen hasi zena, eta horrek bando Nazionalaren barruko bere indartzea eragin zuen.

Kontrastea nabarmena izan zen: matxinatuek hasieratik jaso zuten laguntza militar eraginkor eta zentralizatua Alemaniaren eta Italiaren aldetik. Alemaniako Condor Legioak eta Italiako Aviazione Legionariak hegazkinak, pilotuak, bonbak eta entrenamendua eskaini zituzten; laguntza horrek erabakigarria izan zen Iparraldeko kanpainen eta populazio zibilaren aurkako bonbardaketa masiboetan, Gernika eta Durango kasu. Atzean zegoen helburua estrategikoa eta ideologikoa zen: erregimen faxisten interesak proban jartzea, beren arma eta taktika berriak esperimentatzea, eta Mendebaldeko potentzien pasibotasuna neurtzea.

Aitzitik, Errepublikak Nazioarteko Ez-Interbentzio politika jasan zuen. Britainia Handiak eta Frantziak —gerra European hedatzeko beldurrez— Espainia “neutralizatzeko” proposatutako komiteak laguntza legala debekatu zuen, nahiz eta matxinatuek araua sistematikoki urratu. Horrez gain, beldur gehiago zioten iraultza komunistari Faxismoari baino eta honek ere eragin zuzena izan zuen erabakian. Horrela, Errepublika nazioartean ia isolatuta geratu zen. Egoera hori arintzeko, Sobietar Batasunak armak eta aholkulari militarrek bidali zituen, eta mundu osoko milaka boluntariok eratutako Brigada Internazionalak ere Espainiara etorri ziren, konpromiso politiko eta antifaxistak bultzatuta. Hala ere, laguntza hori ez zen nahikoa izan matxinatuek jasotako laguntza industrial eta teknikoaren pareko izateko. Nazioarteko laguntzan desoreka erabakiorra izan zen gerraren emaitzarako.

Gerra, gainera, gerra mediatikoa bihurtu zen: kazetariak, argazkilariek eta artistek (Capa, Chim, Hemingway, Orwell) nazioarteko iritzia mobilizatu zuten, eta Espainiako gatazka bihurtu zen, praktikan, bigarren mundu-gatazkaren aurreko sinbolo politiko nagusia. Botere faxistek beren nagusitasun teknologikoa erakutsi zuten, eta demokrazia liberalek —bereziki Frantzia eta Britainia Handia— beren pasibotasun estrategikoa agerian utzi zuten.

Ondorioz, nazioarteko testuingurua erabakigarria izan zen: matxinatuek laguntza militar, tekniko eta logistiko sendo eta jarraitua jaso zuten; Errepublikak, berriz, berandu eta baldintza eskasetan jasotako laguntza ideologiko eta fragmentatua. Ezin da Gerra Zibila ulertu nazioarteko botere-blokeen arteko desoreka aztertu gabe, eta are gutxiago matxinatuek izan zuten abantaila estrategiko nabarmena —gerra irabazteko ezinbestekoa izan zena— kontuan hartu gabe.

Historialari askok Gerra Zibila II. Mundu Gerraren atariko edo entsegu gisa interpretatu dute, batez ere aireko bonbardaketen, nazioarteko esku-hartzearen eta faxismo/antifaxismo talkaren ikuspegitik.

5.3 Euskal Estatutua.

Lehenengo Euskal Estatutua 1936ko urrian onartu bazen ere, haren sustraiak askoz zaharragoak dira, eta ezinbestekoa da XIX. mendetik gerora euskal autogobernuaren bilakaera. Foruen abolizioak (1876)

estatuarekiko harreman politiko eta ekonomikoaren aldaketa traumatikoa ekarri zuen, eta horrek autogobernuaren inguruko eztabaida berritu zuen XX. mendearen hasieran. Abertzaletasunaren gorakadak (EAJ), errepublikarrek eta ezker sozialistek autonomia-proiektuak aurrera eramateko nahia partekatzen zuten, nahiz eta bakoitzak ikuspegi desberdinak izan.

1931n II. Errepublika ezarri eta berehala abiatu zen lehen saiakera instituzionala: Lizarra-ko Estatutuaren proiektua. Lau lurralde hartzen zituen (Bizkaia, Gipuzkoa, Araba eta Nafarroa), eta lau lurraldeetako udal gehienek alde bozkatu zuten, Nafarroako udal askok ere neurri handi batean. Hala ere, testu hark elementu gatazkatsu nagusi bat zuen: izaera katolikoko estatutu konfesionala proposatzen zuen, Elizari hezkuntzan eta administrazio-egituretan lehentasun zuzena emanaz eta Vatikanorekin harreman diplomatikoak izateko aukerarekin batera. Formula horrek kontraesan argia sortzen zuen 1931ko Konstituzio laikoarekin, non estatuaren neutralitate erlijiosoa eta kultura-politika sekularra ezartzen ziren. Ondorioz, Gorteek ez zuten Estatutua legezkotzat jo, autonomia-eskubideak defendatu arren.

Eztabaida are korapilatuagoa egin zuen Nafarroaren auziak. Hasierako estatutu-prozesuan Nafarroaren parte-hartzea garrantzitsua izan bazen ere, lurraldeko eskuin katoliko-kontserbadoreak—bereziki karlistak—autonomia-proiektuarekiko errezeloa eta oposizioa handitzen joan ziren hurrengo hilabeteetan. Alderdi hauentzat Estatutuak arrisku politikoa zekarren: EAJ eta ezker errepublikarren gainetik egituratutako autogobernu berriak ez zituen bermatzen haien interes identitario eta sozio-politikoak.

1933–1934 bitartean egin zen bigarren estatutu-saiakera —Lizarrako proiektuaren bertsio aurreratu eta laikoagoa— ez zuen aurrera egin, gobernu erradikal-cedistak ez zuelako eztabaidara ere eraman. Gobernu horrek autonomia-proiektuekiko mesfidantza handia zuen, eta lehentasuna Estatuaren batasuna zelako. Beraz, autonomia, eztabaida parlamentariarik gabe blokeatu zen.

1936an altxamendua gertatu zenean, Nafarroa berehala matxinatuen esku geratu zen, eta horrek ezinezkoa bihurtu zuen lurraldea Estatutuaren azken onarpen-prozesuan sartzea. Horrela, autonomia-proiektua hiru probintzietara mugatu zen.

Gerra piztutakoan, egoera politiko eta militar bereziak autonomia bizkortu zuen. Errepublikak EAJren leialtasuna bermatu nahi zuen (eskuineko alderdi katolikoa izanik, zalantzak sortu ziren alderdian bertan eta noski, beste alderdiengan), eta aldi berean, euskal lurraldea erresistentzia antolatzeke eremu pribilegiatu bihurtu zitekeen. Testuinguru horretan, 1936ko urriko Estatutu laikoa eta demokratikoa onartu zen, eta haren ondorioz sortu zen Euzko Jaurlaritza urriaren 7an, Jose Antonio Agirre lehen lehendakariarekin. Gobernua koalizio zabal batek osatzen zuen (EAJ, PSOE, PCE, ANV), eta berehalako helburuak errepublikaren defentsa militarra eta administrazio zibilaren egonkortasuna uztartzea izan ziren.

Euzko Jaurlaritzak autogobernu oso zabala garatu zuen gerra-testuinguruan. Bere esku geratu ziren:

- Segurtasuna eta ordena publikoa (Ertzaintzaren sorrera eta antolaketa).
- Euzko Gudarostearen egituraketa eta fronteko defentsa.
- Ekonomia eta hornidura politika, bereziki Bilbo setiatua zen bitartean.
- Zerga eta finantza-kudeaketaren zatirik garrantzitsuena, diru-papera propioa antolatuz.
- Atzerriko-harremak antolatu, AEB eta Europara bidalitako ordezkariak diplomatikoekin.

Beste lurralde askotan ez bezala, Euskal Herriak ordena publikoa mantendu ahal izan zuen, tolerantzia erlijiosoa eta Elizaren aurkako indarkeriaren ia erabateko eza. Horregatik, askotan “Euskal Oasia” deitu izan zaio euskal errepublikar eremuari: gizarte anitza eta politizatu izan arren, erakundeek eta alderdiek oreka eta kontrola mantendu zituzten Euskal Gobernupean.

Autonomiak, hala ere, ezin izan zuen luzaro iraun gerra galdu zelako. 1937ko ekainaren 19an Bilbo erori zen, Burdin Hesia hautsia izan ondoren, eta Iparraldeko frontearen desegiteak Jaurlaritzaren jarduna eten zuen lurraldean bertan. 1937ko ekainean eta bando Nazionalaren eraso defendaezinen aurrean, Errepublikatik bakandua zegoen EAJren inguruko euskal agintari eta unitate batzuek italiarrekin errendizio bereizia negoziatu zuten Santoñan, gudarien bizitza salbatzeko asmoz; akordioa ez zuten ez Errepublikako gobernuak ez frankistek onartu.. Hala ere, Agirrek eta bere gobernuak erbestean jarraitu zuten, frankismoaren lau hamarkadetan euskal autogobernuaren legitimotasun politiko eta historikoa mantenduz eta nazioartean ordezkaritza sinbolikoa bermatuz.

Euskal Estatutua, beraz, gerra testuinguruan garatutako autonomia-adierazpen hutsa baino gehiago izan zen: euskal autogobernu garaikidearen lehen egikaritze instituzionala, identitate politikoaren eraikuntza modernorako eta Errepublikaren defentsarako tresna erabakigarria, eta aldi berean, frankismoaren ostean itzuliko zen autogobernuaren oinarri historikoa.

5.4 Gerraren bilakaera (Espainian eta Euskadin).

1936ko uztailaren 17-18ko altxamendu militarrek ez zuen hasieran helburu nagusia lortu: Errepublika azkar eraistea. Matxinatuek lurralde zabalak kontrolatu zituzten, batez ere landa-eremu kontserbadoreetan eta Afrikako Armadaren inguruan, baina ez zituzten berehala hartu hiri nagusiak: Madril, Bartzelona, Valentzia eta Bilbo Errepublikaren alde geratu ziren. Horrek kolpe militarra gerra zibil luze bihurtu zuen.

Hasierako banaketa oso desorekatua izan zen. Matxinatuek armadaren zati garrantzitsu bat, Afrikako tropa profesionalak eta laster Alemaniaren eta Italiaren laguntza militarra izan zituzten. Errepublikak, berriz, biztanleria handiagoa, hiri eta industria-gune garrantzitsuak eta legezko gobernuaren zilegitasuna mantendu zituen, baina armadaren egitura hautsi egin zen, eta lehen hilabeteetan milizien, sindikatuen eta alderdien boterea oso handia izan zen. Horregatik, gerraren hasieran bi arazo nagusi izan zituen Errepublikak: fronte militarra eustea eta aldi berean botere politiko bateratua berreraikitzea.

Gerra hiru urteko prozesu luzea izan zen, eta bere bilakaera lau fase nagusitan azal daiteke: Madrilen defentsa eta frontearen finkapena; Iparraldeko kanpaina eta Euskadiren erorketa; 1938ko ofentsiba handiak eta Ebroko gudua; eta azkenik, Kataluniaren galera, Errepublikaren barne haustura eta Francoren garaipena.

1936: Madrilen defentsa eta gerra luzearen hasiera

1936ko udazkenean, matxinatuen helburu nagusia Madril hartzea izan zen. Hiriburua erortzen bazen, Errepublikaren gobernua kolapsatuko zela eta gerra azkar amaituko zela pentsatzen zuten. Franco buru zuen armada hegoaldetik eta mendebaldetik hurbildu zen, Afrikako tropen, erreketen eta falangisten laguntzarekin.

Hala ere, Madrilek ez zuen amore eman. Gobernua Valentziara lekualdatu zen, baina hirian Defentsa Batzordea antolatu zen, eta miliziek, herritarren mobilizazioak, Armada Popularraren lehen

egituratzeak eta Sobietar Batasunaren lehen laguntza militarrek defentsa ahalbidetu zuten. “¡No pasarán!” leloa Madrilen erresistentziaren sinbolo bihurtu zen.

Madrilgo guduak erakutsi zuen gerra ez zela kolpe militar azkar baten ondorio laburra izango, baizik eta gatazka luze, ideologiko eta nazioartekotua. Matxinatuek Madril ez hartzeak estrategia aldatzera behartu zituen, eta 1937tik aurrera Francok beste helburu militar batzuk lehenetsi zituen.

1937: Iparraldeko kanpaina eta Euskadiren erorketa

1937an Francok erasoaren ardatza Iparraldera eramatea erabaki zuen. Erabaki horrek arrazoi militar, ekonomiko eta politiko argiak zituen. Iparraldean zeuden Bizkaiko industria, burdingintza eta ontzigintza; portuek Errepublikaren hornidurarako garrantzia zuten; eta, gainera, 1936ko urritik Eusko Jaurlaritza eraturik zegoen, Jose Antonio Agirre lehendakari zela, Errepublikaren aldeko autonomia-esperientzia berezi gisa.

Euskadiren egoera zaila zen. Gipuzkoa 1936ko irailean erori zen: Irun hartu zuten lehenik, Frantziarekiko lotura moztuz, eta Donostia irailaren 13an. Horrek Bizkaia isolatuta utzi zuen, eta 1937ko udaberrian frankisten ofentsiba nagusia hasi zen.

Iparraldeko kanpainan nazioarteko laguntza erabakigarria izan zen. Alemaniako Condor Legioak eta Italiako Aviazione Legionariak matxinatuen alde jardun zuten, aireko nagusitasuna emanaz. Horrek eragin zuzena izan zuen Durangoko bonbardaketan, 1937ko martxoaren 31n, eta Gernikakoan, 1937ko apirilaren 26an (mundu mailako ikur bilakatu zena). Bonbardaketa horiek zibilen aurkako gerra modernoaren adibide lazgarriak izan ziren: helburua ez zen soilik kokapen militar bat suntsitzea, atzeguardia beldurtzea baizik, terrorea zabaltzea, komunikazioak haustea eta erresistentzia ahultzea.

Bilbo defendatzeko, Euzko Jaurlaritzak Burdin Hesia antolatu zuen, baina defentsa-sistema horrek ahulezia teknikoak zituen eta, gainera, haren informazioa matxinatuen esku iritsi zen. 1937ko ekainaren erasoan ondoren, Burdin Hesia hautsi zuten, eta ekainaren 19an Bilbo erori zen. Bizkaia galtzeak ondorio militar eta ekonomiko larriak izan zituen Errepublikarentzat: industria-gune estrategiko bat galdu zuen, eta Iparraldeko frontea ia kondenatuta geratu zen.

Bilbo erori ondoren, euskal indar politiko eta militar batzuen inguruan errendizio bereizia negoziatzeko saiakera egin zen italiarrekin Santoñan, gudarien bizitza salbatzeko asmoz. Akordio hori, ordea, ez zuten onartu ez Errepublikako gobernuak ez frankistek, eta ez zuen espero zen babesik izan. Handik gutxira Santander erori zen, 1937ko abuztuan, eta Asturias izan zen Iparraldeko azken erresistentzia-gunea. 1937ko urrian Gijón eta Avilés hartzean, Iparraldeko frontea desagertu zen.

Iparraldea galtzea erabakigarria izan zen. Errepublikak industria-oinarri garrantzitsuena galdu zuen, matxinatuek baliabide ekonomiko eta militar gehiago eskuratu zituzten, eta Francok tropa ugari askatu ahal izan zituen gerraren hurrengo faseetarako.

Errepublikaren barne bilakaera: boterea berreraikitze zailtasuna

Gerraren bilakaera militarra ezin da ulertu Errepublikaren barne egoera kontuan hartu gabe. Hasieratik, gobernuak hiru erronka zituen aldi berean: legeko Estatuaren autoritatea berreskuratzea, miliziak armada erregular batean integratzea eta iraultza sozialaren presioa kontrolatzea.

Largo Caballeroren gobernuak, 1936ko irailetik 1937ko maiatzera, batasun antifaxista zabala lortu nahi izan zuen: sozialistak, komunistak, errepublikanoak eta anarkistak gobernuaren inguruan bildu ziren. Baina batasun hori oso hauskorra izan zen. Alderdi eta sindikatuen artean desadostasun handiak

zeuden: batzuek lehentasuna gerra irabazteari ematen zioten; beste batzuek, berriz, gerra eta iraultza soziala batera egin behar zirela defendatzen zuten.

Tentsio horiek 1937ko maiatzeko Bartzelonako gertakarietan lehertu ziren, komunisten, anarkisten eta POUMen inguruko indarren arteko borroketan. Ondorioz, Largo Caballeroren gobernuak ahuldu zen, eta Juan Negrínek hartu zuen gobernuburua. Negrínen gobernuak zentralizazioa, Armada Popularraren indartzea eta erresistentzia luzearen estrategia bultzatu zituen. Bere kalkulua argia zen: gerra luzatzen bazen, Europako tentsioa handituko zen eta agian demokrazia liberalek edo nazioarteko egoerak Errepublikaren aldeko aukera berriak irekiko zituzten.

Baina aukera hori ez zen gauzatu. Britainia Handiak eta Frantziak ez-interbentzio politikarekin jarraitu zuten, eta Errepublika gero eta gehiago geratu zen Sobietar Batasunaren laguntzaren menpe. Laguntza hori garrantzitsua izan zen, baina baldintzatua ere bai: armak ordaindu behar izan ziren (Nazioaren urrearekin), aholkulari sobietarren eragina handitu zen eta PCEn pisu politikoa nabarmen areagotu zen.

1938: Mediterranea, Ebro eta Errepublikaren azken aukera

1938an gerraren norabidea gero eta argiago makurtu zen frankisten alde. Aragoiko ofentsibaren ondoren, matxinatuek Mediterraneora iritsi ziren, eta Errepublikaren lurraldea bi zatitan banatu zuten: Katalunia alde batetik, eta erdialde-hegoaldeko eremu errepublikarra bestetik. Zatiketa horrek egoera militarra oso larri bihurtu zuen. Aurre egiteko, Errepublikak Ebroko ofentsiba abiatu zuen 1938ko uztailan. Helburua zen frankisten aurrerapena geldiaraztea, bi eremu errepublikarren arteko lotura berreskuratzeko aukera irekitzea eta nazioarteari erakustea Errepublika oraindik borrokatzeko gai zela. Hasieran, errepublikanoek arrakasta taktikoak lortu zituzten, baina laster frankisten nagusitasun materiala eta airekoa gailendu zen. Alemaniaren eta Italiaren laguntzarekin, Francoren armadak kontraeraso gogorra egin zuen. Ebroko gudua 1938ko azarora arte luzatu zen, eta Errepublikak galera militar eta giza galera izugarriak izan zituen. Gudua ez zen berehala gerraren amaiera izan, baina bai Errepublikaren azken gaitasun militar handia agortu zuen unea.

1939: Kataluniaren erorketa, barne haustura eta gerraren amaiera

Ebroko porrotaren ondoren, frankistek Kataluniaren aurkako ofentsiba abiatu zuten. Bartzelona 1939ko urtarrilaren 26an erori zen, eta milaka errefuxiatuk Frantziako mugara jo zuten. Kataluniaren galera kolpe erabakigarria izan zen Errepublikarentzat: lurraldea, industria, komunikazioak eta giza baliabideak ia agortuta geratu ziren.

1939ko otsailean Britainia Handiak eta Frantziak Francoren gobernuak aitortu zuten. Horrek Errepublikaren nazioarteko isolamendua ia erabatekoa bihurtu zuen. Hala ere, Negrínek erresistentziarekin jarraitu nahi zuen, gerraren amaiera negoziatuagoa lortzeko edo Europako egoera aldatuko zen itxaropenarekin.

Baina Errepublikaren barruan zatiketa sakona zegoen. Segismundo Casado koronelak, beste sektore errepublikano eta sozialista batzuekin batera, Negrínen gobernuaren aurkako kolpea eman zuen 1939ko martxoan Madriden, gerra amaitzeko eta Francorekin baldintzak negoziatzeko asmoz. Saiakera horrek ez zuen helburua lortu: Francok ez zuen benetako negoziatziorik onartu, errendizio baldintzarik gabea baizik.

Martxoaren amaieran Madril erori zen ia borrokarik gabe, eta 1939ko apirilaren 1ean Francok gerra amaitutzat eman zuen. Garaipen militarrek ez zuen bake demokratikorik ekarri, baizik eta diktadura luze baten hasiera: errepresioa, erbestea, kartzelak, depurazioak eta beldur politikoa nagusitu ziren urte luzez.

Ondorioa

Gerra Zibilaren bilakaerak erakusten du hasierako kolpe militarren porrot partzialak gatazka luze eta nazioartekotua sortu zuela. Matxinatuek pixkanaka abantaila militarra, nazioarteko laguntza eraginkorra eta aginte politiko zentralizatua lortu zuten. Errepublikak, berriz, legezko gobernuaren zilegitasuna eta hasierako baliabide garrantzitsuak izan arren, zailtasun handiak izan zituen armada erregularra antolatzeko, barne zatiketak gainditzeko eta nazioarteko isolamenduari aurre egiteko.

Euskadin, gerra autonomiaren lehen esperientzia instituzionalarekin lotu zen. Euzko Jaurlaritzak ordena publikoa, defentsa militarra eta autogobernua uztartzen saiatu zen, baina Iparraldeko kanpainak eta Bilboren erorketak euskal autonomia lurraldean bertan eten zuten. Hala ere, 1936ko Estatutuak eta Agirreren gobernuak euskal autogobernuaren memoria politiko eta instituzionala bizirik mantendu zuten erbestean.

Azken batean, gerraren bilakaera ez zen soilik fronte militarretan erabaki. Nazioarteko laguntzaren desorekak, errepresioaren erabilerak, barne antolaketa politikoak, baliabide ekonomikoek eta gizartearen mobilizazioak eragin zuzena izan zuten emaitzan. 1939ko garaipen frankistak Errepublikaren amaiera ekarri zuen, eta Espainia ia berrogei urteko diktadura autoritario eta errepresibo batean sartu zen.

5.5 Erretagoardiako indarkeria.

Gerra Zibila ez zen fronteetako borroka militarra bakarrik izan. 1936ko uztailetik aurrera, erretagoardia ere gerraren eremu nagusietako bat bihurtu zen: herrietan, hirietan, espetxeetan, kuarteletan, elizetan, udaletxeetan eta familetan bertan jokatu zen gatazkaren alde odoltsuenetako bat. Indarkeria politikoa ez zen soilik kontrolik gabeko bortizkeria izan; askotan, etsaia desagerrarazteko, beldurra zabaltzeko eta botere politiko berria ezartzeko tresna bihurtu zen.

Hala ere, ezin dira bi eremuetako indarkeriak modu sinplean parekatu. Bi aldeetan hilketak, mendekuak, fusilamenduak eta jazarpenak gertatu ziren, baina indarkeriaren izaera, antolaketa, iraupena eta helburua desberdinak izan ziren. Errepublikaren aldeko eremuan, lehen hilabeteetako indarkeria neurri handi batean Estatuaren kolapsoaren, milizien boterearen eta mendeku-logiken ondorio izan zen. Matxinatuen eremuan, berriz, errepresioa hasieratik askoz ere antolatuagoa, sistematikoagoa eta botere-proiektu militar eta politiko berriari lotuagoa izan zen.

Matxinatuen eremua: errepresio planifikatua eta botere berriaren ezarpena

Altzamen du militarren hasieratik, matxinatuek ez zuten soilik Errepublikako gobernua garaitu nahi izan; gizartea “garbitu”, aurkari politikoak ezabatu eta ordena autoritario berri bat ezarri nahi zuten. Emilio Molaren aginduek argi erakusten dute terrorearen erabilera ez zela albo-ondorio hutsa: beldurra zabaltzea estrategia politiko eta militarra izan zen.

Matxinatuen kontrolpeko lurraldeetan errepresioa oso azkar jarri zen martxan. Militarrek, falangistak, karlistak, tokiko eskuindarrak eta agintari berriak sare berean aritu ziren askotan. Helburua ez zen soilik armak hartu zituztenak zigortzea; Errepublikarekin, ezkerrekin, sindikatuarekin, laiktasunarekin, autonomiarekin edo erreforma sozialekin lotutako pertsona eta taldeak desagerraraztea edo isilaraztea zen. Errepresio horrek hainbat forma hartu zituen: epaiketak gabeko fusilamenduak, “saca” edo espetxeetatik ateratako presoek hilketak, alkate eta zinegotzi errepublikanoen jazarpena, irakasleen eta funtzionarioen depurazioa, ondasunen konfiskazioa, emakumeen aurkako umiliazio publikoak, espetxeratze masiboak eta beldur sozialaren hedapena. Emakume askori ilea moztu, kalean umiliatu edo erregimen berriaren “eredu moraletik” aldentzeagatik zigorrak ezarri zizkieten; horrek erakusten du errepresioa ez zela politikoa bakarrik, baita soziala, kulturala eta generoari lotua ere.

Eliza katolikoaren hierarkiaren zati handi batek altxamenduari babes ideologikoa eman zion, gerra “gurutzada” gisa aurkeztuz. Horrek matxinatuen diskurtsoari zilegitasun erlijiosoa eman zion eta Errepublikaren aurkako borroka “Espainia katolikoa salbatzeko” ekintza gisa justifikatu zuen. Hala ere, Euskadin egoera bereziagoa izan zen, EAJ katolikoa Errepublikaren alde kokatu zelako eta hainbat euskal apaiz frankistek jazarri edo fusilatu zituztelako.

Errepresio frankista ez zen 1939ko apirilaren 1ean amaitu. Gerra irabazi ondoren, diktadurak errepresioa instituzionalizatu zuen: gerra-kontseiluak, heriotza-zigorrak, espetxeak, kontzentrazio-esparruak, lan-batailoak, depurazio profesionalak eta erbestea erregimen berriaren oinarri bihurtu ziren. Horregatik, frankismoaren indarkeria ezin da gerrako gehiegikeria puntual gisa ulertu; 1936tik aurrera eraikitako estatu autoritarioaren egiturazko osagaia izan zen.

Historialariek kalkulu desberdinak ematen dituzte, baina ohikoa da frankisten errepresioak gerra garaian eta gerraostean 130.000-150.000 biktima inguru eragin zituela aipatzea. Horietatik, milaka pertsona 1939 ondorengo urteetan fusilatuak izan ziren, askotan gerra-kontseilu sumarioen ondoren. Datu zehatza eztabaidatua izan daiteke, baina ondorio historikoa argia da: errepresioa masiboa, luzea eta politikoki antolatua izan zen.

Errepublikaren eremua: Estatuaren kolapsoa eta indarkeria iraultzailea

Errepublikaren aldeko eremuan ere indarkeria oso larria izan zen. 1936ko uztailan, armadaren eta segurtasun-indarren zati baten matxinadak Estatuaren egitura kolokan utzi zuen. Gobernuak ez zuen lehen asteetan ordena publikoa modu eraginkorrean kontrolatzeko gaitasunik izan, eta botere-hutsune horretan miliziek, komite iraultzaileak eta tokiko talde armatuak indar handia hartu zuten.

Testuinguru horretan, eskuineko politikariak, lur-jabeak, apaizak, fraideak, enpresaburuak, militarrek, falangistak edo ustezko “faxistak” jazarri zituzten. Elizen eta komentuen aurkako erasoak, ondasun erlijiosoaren suntsiketa, espetxeetako presoek hilketak eta fusilamendu irregularrak gertatu ziren. Indarkeria horren adibide ezagunena Paracuellos de Jarama da, 1936ko azaro-abenduan, non milaka preso hil zituzten Madril inguruan.

Errepublikaren eremuko indarkeria bereziki gogorra izan zen gerraren lehen hilabeteetan, Estatuaren agintea hautsia zegoenean. Askotan, mendekua, beldurra, antiklerikalismo bortitza, klase-gorrotoa eta iraultza sozialaren logika nahastu ziren. Biktimen artean Elizako kide ugari ziren, baita eskuineko militanteak, jabeak edo Errepublikaren etsaiekin identifikatutako pertsonak ere.

Baina hemen funtsezko ñabardura dago, ezin dena alboratu: Errepublikako gobernuen helburua, pixkanaka, indarkeria irregular hori kontrolatzea izan zen. Giralen, Largo Caballeroren eta batez ere Negrínen gobernuek Estatua berreraiki, miliziak Armada Popularrean integratu, justizia erregularra berrezarri eta komiteen boterea mugatu nahi izan zuten. Prozesua zaila eta ez osoa izan zen, baina 1937tik aurrera errepublikar eremuko legez-kanpoko indarkeria nabarmen gutxitu zen.

Horrek ez du errepublikar eremuko krimenak arintzen. Milaka pertsona hil zituzten, eta askotan defentsarik gabe. Baina historikoki bereiztu egin behar da: indarkeria hori, neurri handi batean, Estatuaren kolapsoaren eta botere iraultzaile deszentralizatuen ondorio izan zen; frankisten eremuan, aldiz, errepresioa askoz gehiago lotu zen aginte militar zentralizatuaren eta estatu berri autoritarioaren eraikuntzarekin; Espainia “garbitzeko” borondate esplizitua eduki zuten.

Kalkulu gehienek errepublikar eremuko erretagoardiako biktimak 50.000-60.000 inguruan kokatzen dituzte. Kopuru hori izugarria da, eta erakusten du Errepublikaren eremuan ere basakeria handia egon zela. Baina frankisten errepresioarekin alderatzean, alde nagusia ez dago kopuruan bakarrik: iraupenean, antolaketan, helburuan eta gerraostean izan zuen jarraipenean ere badago.

Euskadiren berezitasuna: ordena instituzionala eta errepresioaren beste logika bat

Euskadin egoera berezia izan zen. 1936ko urrian Euskal Estatutua onartu eta Euzko Jaurларitza eratu ondoren, Jose Antonio Agirreren gobernuak ordena publikoa eta administrazio zibila modu nahiko eraginkorrean antolatu zituen. EAJren izaera katolikoak, gobernu autonomoaren sendotasunak eta alderdien arteko oreka politikoak eragin zuten errerepublikaren aldeko euskal eremuan indarkeria antiklerikala askoz txikiagoa izatea.

Horregatik erabili izan da “Euskal Oasia” kontzeptua. Ez du esan nahi Euskadin gatazkarik edo indarkeriarik egon ez zenik, baizik eta beste eremu errepublikano batzuekin alderatuta, Euzko Jaurларitzak ordena publikoa hobeto kontrolatu zuela, Elizaren aurkako erasoak oso mugatuak izan zirela eta administrazio autonomoak nolabaiteko egonkortasuna mantendu zuela gerraren baldintza latzetan.

Hala ere, frankistek euskal lurraldeak hartu ahala, errepresio gogorra ezarri zuten. Errepublikaren aldeko agintariak, militanteak, sindikalistak, irakasleak, funtzionarioak eta abertzaleak zigortu zituzten. Kasu bereziki esanguratsua euskal apaizena izan zen: matxinatuentzat onartezina zen apaiz batzuk Errepublikaren eta euskal autonomiaren alde egotea, eta horietako batzuk fusilatu edo gogor zigortu zituzten. Horrek agerian uzten du frankismoaren “gurutzada” diskurtsoa ez zela erlijioaren defentsa hutsa, baizik eta botere politiko autoritario baten eraikuntza.

Hondamendi demografiko eta soziala

Gerra Zibilaren eta lehen frankismoaren ondorio demografikoak izugarriak izan ziren. Kopuruak ez dira beti berdinak historialari guztien artean, baina neurri orokorrean esan daiteke gerrak eta haren ondorengo errepresioak ehunka mila hildako utzi zituztela: fronteko soldaduak, erretagoardian eraildakoak, bonbardaketetako biktimak, espetxeetan hildakoak, gerraosteko fusilatuak, goseak eta gaixotasunek eragindako heriotzak.

Askotan 500.000 hildako inguruko eragina aipatzen da, gerra zuzena, errepresioa, erbestea, gosea, gaixotasunak eta jaiotza-defizita kontuan hartuta. Fronteetan 150.000-200.000 soldadu inguru hil zirela

kalkulatu ohi da. Erretagoardiako errepresioak, bi aldeak kontuan hartuta, 200.000 biktima ingurura hurbildu zen, nahiz eta kopuruak iturrien arabera aldatzen diren.

Erbestea ere hondamendiaren parte izan zen. 1939an, Kataluniaren erorketaren ondoren bereziki, 450.000 pertsona inguruk Frantziako mugara ihes egin zuten. Haietako batzuk gero itzuli ziren, baina milaka pertsonak erbeste luzea bizi izan zuten Frantzian, Mexikon, Sobietar Batasunean, Ipar Afrikan edo Latinoamerikako beste herrialde batzuetan. “Gerraren haurrak” deitutako milaka adingabe ere atzerrira bidali zituzten, bonbardaketetatik eta errepresiotik babesteko; askok urteak eman zituzten etxetik urrun, eta batzuek ez zuten inoiz itzuli ahal izan.

Gerraosteko Espainia ez zen bakearen sinonimo izan. Garaileen bakea izan zen: espetxeak, beldurra, isiltasuna, depurazioak, gosea, lan behartuak eta galtzaileen bazterketa soziala. Frankismoak ez zuen gerra amaitu eta ondoren adiskidetzea bilatu; garaipena errepresioaren bidez sendotu zuen.

Ondorioa

Erretagoardiako indarkeria ulertzea funtsezkoa da Gerra Zibilaren esanahi historikoa ulertzeko. Ez zen soilik fronteetako gerra izan; gizarte osoaren aurkako haustura izan zen. Bizilagunak, apaizak, irakasleak, nekazariak, langileak, alkateak, emakumeak, sindikalistak, abertzaleak eta militante politikoak gatazkaren biktima bihurtu ziren.

Bi aldeetan egon zen basakeria, baina ez zen izaera berekoa izan. Errepublikaren eremuan, lehen hilabeteetako indarkeria batez ere Estatuaren kolapsoari eta botere iraultzaile deszentralizatuei lotu zitzaien; matxinatuen eremuan, ordea, errepresioa sistematikoa, planifikatua eta gerraostean luzatua izan zen. Horregatik, aldeak ez du soilik kopuruekin zerikusia: indarkeriaren logika politikoarekin eta eraiki nahi zen estatu motarekin du zerikusia.

Azken batean, Gerra Zibilaren erretagoardia basakeria historiko baten espazioa izan zen. Bertan ez zen soilik etsaia garaitu nahi izan; askotan, etsaia sozialki ezabatu, memoria kendu eta etorkizun politikoa baldintzatu nahi izan zen. Horregatik, gai hau ulertzea ezinbestekoa da frankismoaren izaera errepresiboa, gerraosteko beldurra eta gaur egungo memoria historikoaren eztabaidak ulertzeko.

Kontzeptuen hiztegia:

- Altxamendu militarra: armadaren sektore batek legezko gobernuaren aurka indarrez egindako matxinada da. 1936ko uztailaren 17-18ko altxamenduak II. Errepublika eraistea zuen helburu, baina porrot partzialak Gerra Zibila eragin zuen.
- Armada Popularra: Errepublikak milizia politiko eta sindikalak armada erregular batean integratzeko sortu zuen egitura militarra da. Helburua defentsa zentralizatzea eta gerra modu eraginkorragoan antolatzea izan zen.
- Autonomia: lurralde batek estatuaren barruan bere erakunde propioak eta autogobernu maila bat izatea da. Gerra Zibilean, Euskal Estatutuaren bidez, Euzko Jaurlaritza sortu zen eta euskal autogobernu garaikidearen lehen esperientzia instituzionala garatu zen.
- Bonbardaketa estrategikoa: helburu militarrez gain, komunikazioak, industria, hiriak edo populazio zibilaren morala suntsitzeko egindako aire-erasoa da. Durango eta Gernikako bonbardaketek zibilen aurkako gerra modernoaren logika erakutsi zuten.
- Burdin Hesia: Bilbo defendatzeko eraikitako defentsa-sistema militarra da. 1937ko ekainean matxinatuek hautsi zuten, eta horrek Bilboren erorketa eta Bizkaiaren galera ekarri zituen.
- Diktadura: boterea pertsona edo talde baten esku kontzentratzen duen sistema autoritarioa da, askatasun politikoak eta oposizioa ezabatuz edo gogor mugatuz. Gerra Zibilaren ondoren Francoren garaipenak ia berrogei urteko diktadura ekarri zuen.
- Erbestea: gerra, jazarpena edo arrazoi politikoengatik norberaren herrialdea uztera behartuta joatea da. 1939an ehunka mila errepublikanok Frantziara eta beste herrialde batzuetara ihes egin zuten, errepresiotik salbatzeko.
- Errepresioa: botere politikoak oposizioa, disidentzia edo aurkari sozialak zigortzeko erabiltzen duen indarkeria eta kontrol-mekanismoen multzoa da. Gerra Zibilean bi aldeetan egon zen, baina frankisten eremuan sistematikoagoa, luzeagoa eta estatu berriaren eraikuntzari lotuagoa izan zen.
- Erretagoardia: frontearen atzean dagoen lurraldea da, non armada zuzenean borrokan ez dagoen baina gerraren ondorio politiko, sozial eta ekonomikoak bizi diren. Gerra Zibilean erretagoardia hilketen, jazarpenen, bonbardaketen, gosearen eta beldurraren espazio bihurtu zen.
- Estatu-kolpea: boterea legez kanpo eta indarrez eskuratzeko saiakera da, normalean armadaren edo elite politikoen parte-hartzearekin. 1936ko altxamendua estatu-kolpea izan zen, legezko gobernu errepublikarraren aurka egina.
- Estatuaren kolapsoa: estatuak ordena publikoa, indarkeria legitimoaren kontrola eta administrazioaren funtzionamendua bermatzeko gaitasuna galtzea da. Errepublikaren eremuan, 1936ko lehen hilabeteetan, kolapso horrek milizien eta komiteen boterea handitu zuen.
- Euskal Oasia: historiografian errepublikaren aldeko euskal eremuko egoera berezia izendatzeko erabili izan den kontzeptua da. Euzko Jaurlaritzak ordena publikoa hobeto mantendu zuen, Elizaren aurkako indarkeria oso mugatua izan zen, eta administrazio autonomoak nolabaiteko egonkortasuna lortu zuen.
- Faxismoa: ideologia autoritario, ultranazionalista, antikomunista eta antiliberala da, lidergo sendoa, indarkeria politiko eta demokraziaren aurkako jarrera defendatzen dituen. Gerra Zibilean Alemania naziak eta Italia faxistak matxinatuen alde egin zuten.

- Frontea: bi armaden arteko borroka-eremua da. Gerra Zibilean hainbat fronte egon ziren: Madrilgoa, Iparraldekoa, Aragoikoa, Ebrokoa edo Kataluniakoa, eta haien bilakaerak gerraren emaitza baldintzatu zuen.
- Gerraren nazioartekotzea: hasieran barne-gatazka zenak kanpoko potentzien laguntza, interes eta esku-hartzearen ondorioz nazioarteko dimentsioa hartzea da. Gerra Zibilean Alemaniak eta Italiak matxinatuei lagundu zieten, eta Sobietar Batasunak eta Brigada Internazionalak Errepublikari.
- Gerra zibila: herrialde bereko talde politiko, sozial edo militarrek elkarren aurka egiten duten gerra da. Espainiizek garrantzi handia izan zuten Errepublikaren defentsan, baina haien autonomia arazo bihurtu zen gerra modu zentralizatuan antolatzeko.
- Militarizazioa: egitura zibil edo irregularrak diziplina eta aginte militar baten menpe jartzeko prozesua da. Errepublikak miliziak militarizatu nahi izan zituen Armada Popularra sortuz; matxinatuen eremuan, berriz, militarizazioa botere politiko osoaren oinarri bihurtu zen.
- Ez-Interbentzioa: Espainiako Gerra Zibilean Europako potentzia batzuek ezarri zuten politika da, teorian bi aldeei laguntza militarra ez emateko. Praktikan, Errepublika kaltetu zuen, Alemaniak eta Italiak matxinatuei laguntzen jarraitu zutelako.
- Polarizazioa: gizarte edo sistema politiko batean jarrerak mutur kontrajarrietara urruntzeko prozesua da. Gerra Zibilaren aurretik eta bitartean polarizazioak akordioa ia ezinezko bihurtu zuen, eta aurkaria etsai politiko eta sozial gisa ikusteko joera indartu zuen.
- Propaganda: iritzako Gerra Zibila 1936tik 1939ra luzatu zen, baina haren ondorio politiko, sozial eta memoristikoak askoz luzeagoak izan ziren.
- Gurutzada: erlijioaren defentsaren izenean aurkeztzen den borroka politiko edo militarra da. Frankismoak Gerra Zibila “gurutzada” gisa aurkeztu zuen, altxamendua Espainia katolikoa salbatzeko ekintza bezala legitimizatzeko.
- Indarkeria politikoa: helburu politikoak lortzeko, aurkaria ezabatzeko edo gizartea beldurtzeko erabiltzen den indarkeria da. Gerra Zibilean fusilamenduak, atentatuak, errepresioa, bonbardaketak eta jazarpen soziala indarkeria politikoaren adierazpenak izan ziren.
- Milizia: alderdi, sindikatu edo talde politiko batek antolatutako indar armatu irregularra da. Gerraren hasieran mili publikoa mobilizatzeko, aurkaria deslegitimatzeko edo norberaren kausa justifikatzeko erabiltzen den komunikazio politikoa da. Gerra Zibilean bi aldeek propaganda erabili zuten, baina nazioartean ere gatazkaren irudia eraikitzeke tresna nagusia bihurtu zen.
- Terrore gorria: historiografian Errepublikaren aldeko eremuan, batez ere 1936ko lehen hilabeteetan, gertatutako indarkeria iraultzaile eta antiklerikalari emandako izena da. Estatuaren kolapsoarekin, milizien boterearekin eta mendeku-logikekin lotuta egon zen.
- Terrore zuria: historiografian matxinatuen eta frankisten eremuan egindako errepresio sistematikoari emandako izena da. Aurkari politikoak, sindikalistak, errepublikanoak, abertzaleak, irakasleak eta bestelako disidenteak ezabatzeko edo beldurtzeko politika antolatua izan zen.